

三
國
志
考
證

序

士人幸際

熙朝沐浴

聖化得以歌咏餘閒研說典籍三吳兩浙人文淵藪幾於戶
戶枕經家家莊史矣經義垂世昭若日星馬班范史有裴馬
顏李之注又累經博雅刊校足爲善本惟承祚國志絕少專
門攷訂之學 殿版正史未易購置世通行者明代監本暨
陳毛諸刻一卷之中譌舛煩積讀者病焉 四庫全書有辨
誤等書藏在 文瀾諸閣撫藩大臣司其扃鑰非謁請較轉
不得欸 閣披誦陳裴之真每爲魯魚帝虎所掩近錢竹坡

序

少詹著攷異三卷與陳少章書並傳 詹不自量更疏其可知者凡衍文若干條脫文若干條譌文若干條異同文若干條其淺顯易改者概不贅辨又閒采傳記畧爲駁解積數年得自以爲攷證者共八卷附登友朋之說梓而存于家後有裴馬顏李諸賢出將刊正詮述以繼三史或不棄芻蕘擷其一二是則生長

聖天子右文之代卽末學鯁生亦竭愚思備采于大著作得名次陳錢之後其榮耀爲何如焉

嘉慶十五年三月下旬吳江潘詹自序

附月日攷舊序

昔歐陽摹賀捷表而閏月貢疑張同識吉千鼎而中春騰

議神祠荒塚之文苔蝕蝸盤之字貶價於石渠損妍於藜

閎非以金石半夸奇而紀傳都寶錄乎然自四海波飛三

方虎踞鼎足之勢雖成建國之模未備或則但徵襍祥或

則不設史官朔惟詳丙寅庚寅魏紀日食惟三月朔書日日僅記辛巳

癸巳蜀志有月無日自即尊後惟書此二日耳承祚闕疏世期通倪十六壬子

攷月無徵管輅傳注正月乙未尋年不得薛綜傳魚豢王沈之籍

缺載陽秋譙周韋曜之書莫紀弦望眉生而椎鈍質抱棘

心長更委蛇口無侷說識戍字於黃童昧六甲五龍之體

問亥年於絳老迷二首六身之文粉墨橫陳蠹芸在手鉛
黃狼藉鞦韆生胸魏武未歷會稽世有外孫壘白之言孫
皓不逢康成世傳日永星火之間虞初頗近齊諧郢書遂
同燕說斯固稗官外乘酒坐卮譚存而不論可也粵稽赤
符失枋黃運乘權御史奉璽繁陽受紱日惟辛未月直秦
正載獻帝起居之注刊黃初受禪之碑志則移律黃鐘別
書元日松之旣依違於帝紀沈約亦承謬於宋書宋書禮志亦以
魏受禪在十一月載攷氐池石立典午代興鐵鎖沈江訝天兵之
飛渡青蓋入洛嘆霸業之遂空元號太康龍游庚子月惟
春季日值壬寅志則一月之日皆譌十五之辰殊謬豈大

晉之平吳畧無注紀龍驤之疏奏曾未寓目乎他若高貴
公之自叙三年或是二年鄆城侯之誅文十七移爲七日
是又黍黎沿誤遠從唐宋之年柳弭傳疑近出元明之代
伏念麟經首重王正馬遷先裁月表別先後者繫乎月日
攷盛衰者存乎歲年此猶不知其他可想宋紀符瑞遠及
文皇晉志天文上推元帝伊闕壁間之勒千金竭上之銘
南郡太守之碑太僕荀君之碣明魄可尋朧朧畧見鈇規
薄技鑽笮寸長擬劉羲叟之作長術倣杜元凱之攷春秋
斷自延康訖於天紀夫乾象江東四分益部曷初殷統嘉
平夏正葭管灰飛玉律異參差之候靈臺雲物璇璣分舒

疾之辰則攷時也難建興甘露分號東西正始太和後同

拓跋華陽志之矛盾水經注之牴牾資水注魏咸熙二年吳寶鼎元年湘水注

魏咸熙二年孫皓之甘露元年苟一名之不核必至以甲而塗乙則博古

不易又况家居僻境元亭阻載酒之車室少琳瑯漢書匪

葫蘆之本此中空洞凡事粗疏曠三千年而譚庚癸既如

夏蟲言冰越十七代而議蛇龍亦祇秋蟬論雪而已

嘉慶十年龍集乙丑斗柄建巳月朔潘眉自叙

三國志攷證卷一

魏書一

魏說文作魏收鬼部徐鉉曰今人省山以爲魏國之魏眉
按魏蜀吳之魏本作魏故文帝紀注引易運期曰鬼在山
禾女連王天下此魏有山字之明證也

武帝紀

姓曹諱操

班史帝紀不書諱班氏以漢人撰漢書故諱不書史記前
代本紀皆書名至高祖但書字此古例也陳壽在易姓後

三國志卷之十一
修史例得書諱

曹騰封費亭侯

攷騰封費亭侯在建和初曹騰碑云惟建和元年七月二十
十二日皇帝若曰其遣費亭侯之國

莫能審其生出本末

陳志于帝紀云莫能審其生出本末於列傳則以夏侯惇
夏侯淵曹仁曹洪曹休曹真夏侯尚爲一卷顯以夏侯氏
爲宗室矣

注
陽敗面喎口

一切經音義六引通俗文斜戾曰喎喎俗字正作𠵽許慎

解字云冑口戾不正也

注

抄集諸家兵法名曰接要

本名兵書接要今亡太平御覽八引魏武兵書接要曰孫

子稱司雲氣非雲非煙非霧形似禽獸客吉主人忌又御覽一引魏武兵書接要曰大軍將行雨濡衣冠是謂灑兵其師有慶三軍將行其旗摯然若雨是謂天露三軍失徙將軍雨甚是謂浴屍先陣者敗亡多占驗語

遷爲濟南相國有十餘縣

續漢郡國志濟南國領十縣此云國有十餘縣錢少詹攷異云或漢末更有增置之縣詹按餘字乃衍文錢說非也

御覽三十九引魏志云國有十縣無餘字知宋本作國有十

縣今本妄增餘字

於是奏免其八

御覽三十九引魏志作奏免其八九今本脫九字

注賈人或假二千石輿服導從作倡樂

此卽後世迎神賽會之類

初平三年注於夫羅者南單于子也

攷於夫羅父南單于名羌渠見晉書劉元海傳後漢書南

匈奴列傳云單于羌渠立十年子右賢王於夫羅立

注其道乃與中黃太乙同

太乙者天之貴神黃巾張角自稱黃天此中黃太乙當卽黃巾之美號

建安四年河內太守繆尙

繆當爲繆文選荀彧檄吳將校部曲云薛洪繆尙開城就化字正作繆从木旁李善注繆音留

廬江太守劉勳率衆降封爲列侯

劉勳封華鄉侯見勸進表

五年乃使張郃高覽攻曹洪

荀彧檄吳將校部曲云張郃高覽舉事立功李善注魏志云高覽此云高奐蓋有二名

九年留蘇由審配守鄴

荀彧檄吳將校部曲云將軍蘇游反為內應李善注游與

由同

十三年引用荊州名士韓嵩鄧義等

劉表傳鄧義即此人字當為義

注輒削焚其札 候其醉而竊其札

玉海札並作柎削下有而字

十四年開芍陂屯田

劉澄之豫州記陳縣地有芍陂湖壽春圖經云芍陂在安

豐縣

十五
年注 以及子植兄弟 前朝恩封三子爲侯

何義門曰植當爲桓眉按張溥漢魏名家文集已作子桓
此義門所本也然攷是時方封曹植曹豹爲侯所謂
前朝恩封三子爲侯是也植字不誤曹丕于十五年未受
朝職至十六年始爲五官中郎將張何二家改子植爲子
桓但據兄弟之次序不攷受爵之先後皆似是而實非者
也

十六
年注 豹爲饒陽侯

按武二十五子無名豹者攷十六年所封饒陽侯沛穆王
林也豹卽林之初名

三
十八
年 又加君九錫

九錫之典公羊說一曰加服二曰朱戶三曰納陛四曰輿
馬五曰樂則六曰虎賁七曰斧鉞八曰弓矢九曰秬鬯此
一車馬二衣服三樂則四朱戶五納陛六虎賁七斧鉞八
弓矢九秬鬯蓋用禮緯含文嘉次序後代並依之韓嬰言
九錫亦同禮緯惟王莽九錫次序又在公羊緯禮緯之外
如云莽稽首再拜受綠鞞袞冕衣裳瑒瑒珌句履鸞路
乘馬龍旂九旒皮弁素積戎路乘馬彤弓矢盧弓矢左建
朱鉞右建金戚甲冑一具秬鬯二卣圭瓚二九命青玉珪
二朱戶納陛署宗官祝官卜官史官虎賁三百人家令丞

各一人是也

注奮威將軍樂鄉侯劉展

當依典論作鄧展所謂願鄧將軍捐棄故伎更受要道者
卽其人也

天子娉公三女爲貴人

三女一名憲一名節一名華見漢獻穆皇后傳陳留王紀
書故漢獻帝夫人節薨蓋帝以公中女爲后

九月作金虎臺

凡受九錫者必有金虎符第一至第五左竹使符第一至
第十公以是年受九錫金虎臺之作所以彰錫命也金虎

臺去銅爵臺六十步

二十二年 公自陳倉以出散關

李吉甫云陳倉在寶雞縣東二十里散關在縣西南五十
二里自陳倉出散關則由東而往西南也

注 章一名元、

元當為允即獻帝春秋所稱邊允

復漢寧郡為漢中

張魯據漢中改漢中郡為漢寧郡

劉昭引袁山松漢書云建安二十年復置漢寧

郡至是始置而云復置者多一復字也章懷注劉焉傳亦引袁山松漢書云建安二十年置漢寧郡無復字知劉昭為誤至是降魯乃復為漢中郡

分漢中之安陽西城爲西城郡置太守分錫上庸郡置都尉
按下句當云分錫上庸置都尉郡字衍文蓋安陽西城錫
上庸皆漢中屬縣魏武分安陽西城二縣置西城郡又分
錫上庸二縣置都尉凡置都尉者皆名曰部如某郡某部
都尉是也上庸本非郡而此時亦未爲郡故不應有郡字
錢少詹攷異云上庸置都尉而蜀志劉封傳封與孟達會
上庸上庸太守申耽舉衆降上庸亦置太守也眉按劉封
傳注引魏畧曰申耽遣使詣曹公曹公使領上庸都尉此
上庸始置都尉之證也至建安末劉封孟達會上庸上庸
太守申耽舉衆降耽初爲上庸都尉至是稱上庸太守當

是中間已立上庸郡史畧而不載耳自上庸西屬先主命
耽領太守如故是蜀以上庸爲郡也後孟達降魏魏文帝
并房陵上庸西城爲新城郡上庸郡始廢明帝太和二年
又立太和四年又省景初元年分魏興之魏陽錫郡之安
富上庸爲上庸郡至是又立旋又廢至高貴鄉公甘露四
年分新城郡復置上庸郡此魏朝上庸郡廢置之顛末也
當在建安二十年錫上庸俱是縣不當有郡字 或舊作
分錫上庸爲某部置都尉今本譌闕耳

注
又置關內外侯

關內侯係舊爵非新置當作又置關外侯衍內字然關外

侯不見紀傳

二十一年匈奴南單于呼廚泉

呼廚泉卽於夫羅之弟時於夫羅死呼廚泉繼立以於夫羅子豹爲左賢王見劉元海傳南匈奴傳云於夫羅立七年死弟呼廚泉立

文帝紀

諱丕

按闕澤云丕爲丕字當爲丕今作丕者非

延康元年注設伎樂百戲

詩所陳百戲備載大饗碑中其文曰六變旣畢乃陳秘戲

巴俞丸劒奇舞麗倒衝夾踰鋒上索踰高舩鼎緣橦舞輪
擣鏡騁狗逐兔戲馬立騎之妙技白虎青鹿辟非辟邪魚
龍靈龜國鎮之怪獸瓌變屈出異巧神化

冬十一月癸卯

十一月當作十月後漢書獻帝紀建安二十五年冬十月
乙卯皇帝遜位魏志文昭甄皇后傳黃初元年十月帝踐
阼魏受禪碑十月辛未受禪於漢五代史張策傳曹公薨
改元延康是歲十月文帝受禪皆是十月受禪之證紀先
書十一月癸卯後又書十一月癸酉兩書十一月既於文
爲複而癸卯癸酉相距三十一日亦無同在十一月之理

宋書禮志云漢延康元年十一月禪帝位于魏開府元龜
帝王部云延康元年十一月受禪並沿陳志之誤朱竹垞
跋孔羨碑云魏受禪在延康元年十一月亦失於不攷耳
注
代赤眉者魏公子

赤眉東漢賊號讖言代赤眉甚無謂也攷宋書符瑞志引
春秋玉版讖曰代赤者魏公子無眉字蓋漢火德屬赤故
云代赤此處多眉字也

注
孝經中黃讖曰日載東絕火光不橫 聖聰明四百之外
易姓而王

南監本及諸本聖上並缺一字攷宋符瑞志作一聖明聰

又按日載東者瞽字故曰魏王姓諱著見圖讖

注
五八四十黃氣受

魏以土德王故曰黃氣受五八四十者魏享國年數自黃
初元年庚子至甘露四年己卯得四十年次年司馬氏弒
高貴鄉公矣又文帝年四十崩亦合五八四十之數

注
七百二十年爲一軌

軌者世軌也世軌有二一爲唐堯世軌以七百六十歲爲
一軌一爲文王世軌以七百二十歲爲一軌其推算之法
同乾鑿度云軌以七百六十爲世軌者堯以甲子受天元
爲推術洛書靈准聽云八九七十二錄圖起鄭康成注八

九相乘七十二歲而七百二十歲復於冬至甲子生象其數以爲軌焉故曰錄圖起之象數論曰求世軌置積算以大周三萬一千九百二十除之餘以七百六十而爲一軌不滿軌者卽入軌之年也一軌消息一卦大周逢奇起復逢偶起姤四十二軌消息卦三周有半八十四軌七周所謂八十四戒也文王世軌法亦同以七百二十年爲一軌此云七百二十年爲一軌蓋用文王世軌

注比年己亥壬子丙午日蝕皆水滅火之象也

按丙午二字當衍宋符瑞志載許芝曰建安二十一年五月朔己亥日蝕二十四年二月晦壬子日蝕日者陽精月

為侯王而以亥子日蝕皆水滅火之象也蓋日為陽精亥子屬水故為水滅火若丙午日蝕丙午屬火與亥子有別而曰水滅火其義不合宋志載許芝之言亦不及丙午後漢書獻帝紀載日食甚詳如建安五年九月庚午朔六年三月丁卯朔十三年十月癸未朔十五年二月乙巳朔十七年六月庚寅晦二十一年五月己亥朔二十四年二月壬子晦二十五年二月丁未朔建安至延康日食凡八有己亥壬子而無丙午足證此丙午二字之誤

注
柏城子高

柏城與下文柏成並誤當作伯成田疇傳注與莊子合

注遭無妄厄運之會值炎精幽昧之期

按京房說无妄大旱之卦萬物皆死無所復望漢書律秣志易无妄曰初入元百六陽九次三百七十四陰九谷永傳遭无妄之卦運值百六之災阨韋昭吳書曰天地反易遭无妄之運

注輔國將軍清苑侯劉若

魏公卿上尊號奏作清苑鄉侯當以碑爲正攷劉若在武帝時爲清苑亭侯至是進爵鄉侯矣

注方將整以齊斧

易旅卦釋文引張軌注云齊斧黃鉞斧也晉書音義引張

晏曰齊斧征伐斧也以整齊天下也

注魏以改制天下與時協矣

宋符瑞志作魏以改制天下與詩協矣宋志是也蓋上引詩推度災云云故當云與詩協作時字者誤

注始魏以十月受命

始字衍文宋符瑞志無始字

注及九卿上言

按武帝紀建安十八年初置尚書侍中六卿此云九卿者二十一年置奉常宗正二卿二十二年又置衛尉卿是時魏已備九卿然攷魏公卿上尊號奏署名者奉常臣貞邢

郎中令臣洽和洽衛尉臣昱程昱太僕臣夔何夔大理臣繇鍾繇大

農臣霸袁霸少府臣林常林惟有七卿無大鴻臚宗正此云九

卿亦約舉之耳吳至孫休永安二年始備九卿

黃初元年追尊皇祖太王曰太皇帝考武王曰武皇帝

是時刻金璽追加尊號不敢開埏乃為石室藏璽埏首見

宋書禮志

長水校尉戴陵

蜀志諸葛亮傳注亦作戴陵攷公卿上尊號奏長水校尉

關內侯臣凌从水旁當以碑為正宋書五行志作戴凌

二年乙亥朝日于東郊注裴松之曰正月郊祀有月無日乙亥

朝日則有日無月蓋文之脫也

按明帝紀太和元年二月丁亥朝日用春分此乙亥朝日
乃在正月與春分禮自別蓋是年二月無乙亥乙亥正月
初四日也裴世期不通秬術故疑乙亥在二月遂以紀不
書二月爲文之脫 建安二十四年己亥歲十一月小己
卯朔旦冬至爲部首十二月大戊申朔黃初元年正月小
戊寅朔二月大丁未朔三月小丁丑朔四月大丙午朔五
月小丙子朔六月大乙巳朔七月小乙未朔八月大甲辰
朔九月小甲戌朔十月大癸卯朔十一月小癸酉朔十二
月大壬寅朔二年正月小壬申朔二月大辛丑朔

是年六月小庚

子朔下文云六月庚子初祀嶽瀆戊辰晦日有食之

悽悽焉遑遑焉

悽悽論語作栖栖後漢書周黃徐姜申屠列傳贊悽悽碩人陵阿窮退注悽悽饑病貌文選答賓戲棲棲遑遑注棲遑不安居之意也悽悽訓饑病字義不合當从文選作棲从木旁棲與栖同

初復五銖錢

漢世五銖錢行最久董卓壞之更鑄小錢至是始復是年因穀貴旋罷明帝太和元年復行王莽貨泉亦重五銖惟無五銖字右文曰貨左

文曰泉

戊辰晦日有食之

晉志六月二十九日戊辰加時未日蝕

以大將軍曹仁爲大司馬

漢光武建武二十七年罷大司馬置太尉以代之至此復置大司馬而亦不廢太尉

三年閏月孫權破劉備于夷陵

紀以閏月書于五月之下是年閏六月也

苞原隰險阻而爲軍者

苞與包通易泰卦包荒釋文云本作苞姤卦包瓜子夏傳作苞瓜包有魚釋文云本作苞書禹貢草木漸包釋文云

本作苞禮記樂記包之以虎皮史記樂書作苞

表首陽山東爲壽陵

許慎云首陽在遼西此又一首陽李吉甫云在河南偃師縣文帝陵在焉又按雷首山亦名首陽山

四年改漢氏雲翻舞曰鳳翔舞文昭舞曰大昭舞

雲翻當依宋書樂志作雲翹文昭大昭兩昭字皆誤文昭當作文始大昭當作大韶兩漢有文始無文昭文始本韶樂故改文始爲大韶

六年討鮮卑軻比能

今之熱河卽鮮卑軻比能故地

五月 壬戌熒惑入太微

宋天文志五月十六日壬戌熒惑入太微至二十六日壬申與歲星相及俱犯右執法至二十七日癸酉乃出今推黃初六年五月朔丁未與宋志相符

行幸廣陵故城

李吉甫云廣陵在江都縣北四里州城正直其上大江西北自六合縣界流入南對丹徒之京口舊濶四十里文帝詩曰誰云江水廣一葦可以航正謂此處也

七年 注 惟黃初七年五月七日

按帝以丁巳日崩推是年五月辛丑朔十七日乃得丁巳

誅當云五月十七日今本脫十字也

注 歎自僵斃

歎當爲欲

注 求光幽昧

求光誤當依曹子建集作末光幽昧

注 正行定紀

正行當爲五行

注 雲英甘露織圖被宇

織圖當作灑塗毛本誤

注 將登介山

曹子建文集作將登泰山按介山不誤司馬相如封禪文云以登介邱不亦惡乎介山猶介邱卽謂泰山

注 胡冲吳歷

注引吳歷曰帝以素書所著典論及詩賦餉權於孫權傳又引之蜀先主傳兩引江表傳備立營于油江口改名公安明帝紀關羽傳兩載羽乞娶秦宜祿妻皆是重複不檢之病

注 日多體健心每不厭

御覽九十引作日夕體倦心猶不厭

注 典論自叙

御覽九十靡不畢覽句下尙有數句云所著書論詩賦凡六十篇至若知而能愚勇而能怯仁以接物恕以及下以付後之良史

注方食芋蔗

芋蔗當為竿蔗上林賦諸柘注曰諸柘甘柘也廣志作竿蔗一切經音義引通俗文荊州出竿蔗竿古寒反音干或又作甘蔗或又作干柘蓋諸柘甘柘甘蔗干柘竿蔗並通惟不作芋蔗耳御覽五百九十二引典論亦作芋蔗蓋沿誤久矣

明帝紀

太和元年丁亥朝日於東郊 秋八月夕月於西郊

此朝日夕月用春秋二分八月下脫已丑二字宋書禮志作八月己丑後通攷本之

注二年 劉升之兄弟守空城而已

此劉升之當指後主後主字公嗣不字升之將初名阿斗時有此字耶

注又為地突欲踊出於城裏

按突如墨子備突之突墨子言城百步一突門突門各為窰竈竇門中吏主塞突門用車兩輪以木束之塗其上維置突門內為橐充竈伏柴艾寇即入下輪而塞之鼓橐而

熏之墨子所謂突係守城之突非攻城之突攻城者穿其城使若突門然亦可謂突也

黃霽青 安濤 曰魏武攻鄴為地道審配於內作塹以當之

配將馮禮開突門內太祖兵配從城上以大石擊突中柵門柵門閉入者皆沒魏武為地道通突門故馮禮得開突門內兵地道猶地突也

三年使太常韓暨持節迎高皇帝太皇帝武帝文帝神主於鄴攷宋書禮志時與韓暨同使有行太廟宗正曹恪此闕高皇帝曹騰太皇帝曹嵩

四年六月戊子太皇太后崩

錢少詹攷異云后妃傳作五月眉推太和四年五月無戊子后妃傳誤

青龍元年青龍見邽之摩陂井中

水經注摩陂在潁川邽縣縱廣可十五里摩陂祇此一處此獨言邽之摩陂者文有詳畧耳史炤通鑑釋文言摩陂一在邽鄆胡三省已辨之矣

慎勿越塞過句注 軌以進軍屯陰館

句注在雁門陰館明帝勅勿過句注而軌以屯陰館則已在句注矣師古曰句音章句之句

遣驍騎將軍秦朗將中軍討之

驍騎將軍掌禁軍故云將中軍中軍者禁軍也

年二月乙未太白犯熒惑

沈志云二月己未太白犯熒惑推是年二月無乙未當從
沈志

三月庚寅山陽公薨

自禪位至此十四年

注
又致巾幘婦人之飾

幘儀禮士冠禮注作幘後漢書烏桓傳作箇幘箇箇同字
說文幘婦人首飾从巾國聲徐鉉音古對切楊升庵曰古
畫婦女有頭施紺鬋者卽此制也

三年博士馬均

均與鈞同然字當作鈞杜夔傳注馬鈞字德衡鈞衡字相應

注 作司南車

司南即指南鬼谷子云鄭人取玉必載司南晉輿服志司南車駕四馬其下制如樓三級四角金龍銜羽葆刻木為仙人衣羽衣立車上車雖回運而手常南指大駕出行為先啓之乘

注 歲首建巨獸魚龍曼衍弄馬倒騎備如漢西京之制

蔡質漢儀曰正月旦天子幸德陽殿臨軒作九賓徹樂舍

利從西方來戲於庭極乃畢入殿前激水化爲比目魚跳躍就水作霧郭日畢化成黃龍長八丈出水遊戲於庭炫耀日光以兩大絲繩繫兩柱中頭間相去數丈兩倡女對舞行於繩上對面道逢切肩不傾又踰局出身藏形于斗中鍾磬並作樂畢作魚龍曼延

注在中大告開壽

按宋書符瑞志作中正大吉關壽當從之程猗贊曰體正而王中允克明關壽無疆於萬斯靈卽用中正關壽等字足證此注之譌

景初元年春正月壬辰山荏縣言黃龍見

是年正月無壬辰當作二月宋符瑞志景初元年二月壬辰山荏縣言黃龍見

山荏縣

荏當爲荏

樂用章武之樂

章武當爲章斌宋書樂志載魏公卿奏曰於文文武爲斌兼并文武聖德所以章明也臣等謹制樂舞名章斌之舞

注以舜妃伊氏配

吳仁傑漢書刊誤補遺云樂厯取范氏實陶唐之裔曰樂祁舜妃當曰祁氏眉按世紀慶都寄于伊長孺家堯從母

所居爲姓靈臺碑云慶都兆會穹精氏姓曰伊然則作伊氏者是也

年二以沛杼秋公邱彭城豐國廣戚并五縣爲沛王國

五縣沛杼秋公邱豐國廣戚也彭城乃郡名言彭城之豐國廣戚也又按郡國志豐屬沛今在彭城郡當是魏初移屬彭城耳

注蜀陰平太守廖惇反

惇乃淳字之譌廖化本名淳見蔣琬宗預二傳蜀志不言化爲陰平太守史闕畧

注三年中書監劉放令孫資

合中書令也

注裴松之曰建安九年文帝納甄后明帝應以十年生至此可疆名三十五年不得三十六

按裴松之以明帝應以十年生此臆斷語全無依據攷水經注延康元年以武德封曹叡爲國本紀載年十五封武德侯延康元年卽建安二十五年帝是年十五則生於建安十一年也帝以建安十一年生至二十五年爲十五歲加黃初七年太和五年景初四年青龍三年共得三十四年但可疆名三十四并不得三十五

三國志攷證卷二

吳江 潘眉 稚安 著

魏書 二

齊王紀

注 文帝以為火性酷烈無含生之氣

法苑珠林載文帝語云火功尚能鑠石銷金何為不燒其布當必有所本

注 詔以典論刊石于廟門之外及太學與石經並

典論凡六碑見水經注十按漢蔡邕石經在太學講堂前

東側魏正始石經在太學講堂前西側明帝刊典論時魏

石經尙未刊立詔令與石經並應在堂東而酈道元云魏石經樹於堂西石長八尺廣四尺列石於其下碑石四十八枚廣三十丈典論六碑附於其次是酈元所見典論石碑在堂西魏石經之次初不與漢石經並也大抵初刊典論時詔立堂東與漢石經並後魏自刻石經乃遷典論石碑於堂西自與魏石經並耳

又按魏石經有二一爲三字石經一爲一字石經攷隋書經籍志一字石經周易一卷一字石經尙書六卷一字石經魯詩六卷一字石經儀禮九卷一字石經春秋一卷一字石經公羊傳九卷一字石經論語一卷一字石經典論

一卷三字石經尚書五卷三字石經春秋三卷金石家咸謂一字三字俱齊王正始年刊。隋志目次攷之一字石經當刊于明帝太和四年。是時詔以典論刊石與石經並。所謂石經卽魏一字石經也。至正始年又刊三體石經與一字石經並立。後人不考遂以爲俱在正始年刊。失其實矣。

正始元年

明帝以景初三年正月崩。齊王卽位。踰年改元爲正始。以今攷之。實踰兩年。蓋魏景初以建丑爲正月。春正月者夏正之十二月也。明帝以三年正月崩于夏。正爲二年十二

三國志卷之二十一
二
月齊王以是月卽位後仍用夏正以三年正月爲二年後
十二月至三年之十二月不得復爲正月故再踰年而後
改元也明帝崩與齊王改元相距凡十四月

春二月乙丑

二月當爲正月是年二月無乙丑乃正月十六日

自去冬十二月至此月不雨丙寅詔令獄官亟平冤枉

自去冬十二月至三月不雨也陳志以此句屬之二月之
下讀者誤以爲二月而不知二月旣是正月之譌又乙丑
與丙寅相距六十一日丙寅乃三月十八日也平冤枉求
讜言正爲不雨

正始五年注

升程昱而遺郭嘉先鍾繇而後荀攸則未詳厥趣也
松之此論以功臣配祀有程昱而無郭嘉爲未當也然是
時雖無郭嘉後景元三年以嘉祀太祖廟廷終得與配祀
之典至如二十一人曹真曹休夏侯尚桓階陳羣鍾繇張
郃徐晃張遼樂進華歆王朗曹洪夏侯淵朱靈文聘臧霸
李典龐德典韋及荀攸而已其中實無程昱且終魏之世
不聞升配而松之以爲升程昱而遺郭嘉未詳厥趣果何
見而云然耶

八年諫議大夫孔晏父

孔晏父當衍晏字下云晏父咸因闕以進規諫謂何晏孔

父同時進諫前有何晏奏因下連言晏父遂誤以孔父為孔晏

父耳倉慈傳濟南相魯國孔父孔氏譜孔父字元儁晉書

孔衍傳祖父魏大鴻臚皆作孔父無晏字可證俗本晉書祖父作祖

文誤

嘉平三年戊寅太傅司馬宣王薨

戊寅上當有八月此闕文

五年西平郭脩

少帝紀與蜀志張嶷傳皆作郭脩費禕傳作郭循修循字

形相近故易誤如後漢書袁紹傳吳循魏書袁紹傳作吳

脩吳書孫皓傳滕循禪國山碑亦作滕循王隱交廣記及

晉書皆作滕脩凡此之比不可枚舉

賜銀千餅

餅字不誤一本作餅者非陳矯傳注引世語以金五餅授之亦作餅爾雅餅金謂之鈇司馬溫公類篇餅金餅法苑珠林樹神以金一餅賜之音釋餅金鈇也墨莊漫錄韓滉與擔夫白金一版按版與鈇同一版猶言一鈇卽一餅也

正作餅

六年四五人的頭面縛

的頭之的似當爲勒言羈勒其頭

注青頭雞者鴨也

三國志卷之二十一
二
鴨謂畫押見日知錄

沈漫女德

沈漫晉書景帝紀作沈媪當从女旁賈子道術云接遇肅
正謂之敬反敬爲媪

注羣臣共爲奏永寧宮

守尙書令太尉長社侯臣孚

司馬孚也晉書本傳遷尙書令進爵長社縣侯代王凌爲
太尉

大將軍武陽侯臣師

司馬師也景帝本紀初封長平鄉侯嘉平四年遷大將軍

不載進封武陽侯當据此奏補之是年三月增邑九千戶并前四萬則已有三萬一千戶非鄉侯可知

司徒萬歲亭侯臣柔

高柔也齊王紀正始九年以司空高柔爲司徒按本傳初封延壽亭侯後太傅誅曹爽以功進封萬歲鄉侯由亭侯進封當爲鄉侯此作亭侯者誤當依本傳爲鄉侯

司空文陽亭侯臣冲

鄭冲也齊王紀嘉平三年以光祿勳鄭冲爲司空晉書本傳不言封文陽亭侯當以此奏補之

行征西安東將軍新城侯臣昭

司馬昭也按文帝本紀景初二年封新城鄉侯轉安東將軍東關之敗坐失侯後行征西將軍降北虜以功復封新城鄉侯至高貴鄉公立始進封高都侯奏永寧宮時實鄉侯非邑侯也當作新城鄉侯此脫鄉字 於書例當云安東將軍行征西將軍新城鄉侯

光祿大夫關內侯臣邕

孫邕也管寧鮑勳等傳屢見論語集解序有光祿大夫關內侯臣孫邕後由關內侯進封建德亭侯見任城太守孫夫人碑

太常臣晏

任晏也錢少詹云晉書任愷傳父吳魏太常晏昊字形相似疑卽其人也

衛尉昌邑侯臣偉

滿偉也滿寵傳寵封昌邑侯子偉嗣官至衛尉

太僕臣疑

庾疑也晉書宣帝紀齊王嘉平三年天子使兼大鴻臚太僕庾疑持節策命帝爲相國魏志張莛傳亦載太僕庾疑
廷尉定陵侯臣繁

鍾毓也繁字誤鍾繇封定陵侯子毓嗣毓傳云爲侍中廷尉

大鴻臚臣芝

魯芝也晉書本傳以綏緝有方遷大鴻臚高貴鄉公卽位
賜爵關內侯

大司農臣祥

王祥也晉書本傳王祥累遷大司農

少府臣褻

鄭褻也褻字誤下注云少府褻字亦誤晉書本傳拜侍中
遷少府迎高貴鄉公子元城

永寧衛尉臣禎

何禎也永寧太后宮名甘露二年司馬昭奉天子及皇太

后征諸葛誕假廷尉何禎節按禎字誤當从木旁張璠傳
宏農太守何楨注引文士傳云楨字元幹楨幹字相應从
木旁作楨是也

永寧太僕臣閔

張閣也閔字譌錢少詹云未詳其族姓眉按邴原傳稱永
寧太僕東郡張閣卽是此人閔字子臺臺閣字相應知閔
字誤

大長秋臣模

疑是尹模晉書何曾傳云撫軍校事尹模憑寵作威朝野

畏憚

亦見程
曉傳

司隸校尉穎昌侯臣曾

何曾也晉書本傳嘉平中為司隸校尉正元中進封穎昌鄉侯按此時已封穎昌侯晉史誤

河南尹蘭陵侯臣肅

王肅也本傳嗣父朗爵蘭陵侯為河南尹

城門校尉臣慮

其人未詳慮錢少詹攷異作憲

中護軍永安亭侯臣望

司馬望也高貴鄉公紀注中護軍司馬望晉書司馬望封

永安亭侯遷護軍將軍

武衛將軍安壽亭侯臣演

曹演也曹仁傳仁弟純封高陵亭侯子演嗣官至領軍將軍

中堅將軍平原侯臣德

甄德也文昭甄皇后傳封甄惠爲平原侯

中壘將軍昌武亭侯臣廙

荀廙也荀彧孫官至中領軍夏侯元傳注引世語云散騎常侍荀廙晉書侯史光傳亦作荀廙

屯騎校尉關內侯臣陔

武陔也晉書本傳云累遷司隸校尉司隸卽屯騎之譌

步兵校尉臨晉侯臣建

郭建也明元郭皇后傳甄惠及建皆封列侯並掌宿衛

射聲校尉安陽侯臣温

甄温也

越騎校尉睢陽侯臣初

疑是曹初曹仁孫

長水校尉關內侯臣超

疑是徐超唐書宰相世系表徐超魏散騎常侍

侍中臣小同

鄭小同也高貴鄉公紀侍中鄭小同

臣顓

荀顓也高貴鄉公紀侍中荀顓

臣艷

趙艷也司馬朗傳注趙艷驃騎將軍封東平陵公晉景帝紀嘉平四年趙艷張緝預朝議卽其人也

博平侯臣表

華表也晉書本傳拜散騎黃門郎累遷侍中高貴鄉公立表懼禍作稱疾歸下舍此侍中臣表卽華表史不言封博平侯畧也

侍中中書監安陽亭侯臣誕

韋誕也劉劭傳注韋誕太和中補侍中文章叙錄曰稍遷
侍中中書監以光祿大夫遜位

散騎常侍臣瓌

司馬瓌也晉書司馬瓌魏長樂亭侯歷振威將軍秘書監
臣儀

王儀也錢少詹未詳詹按王脩傳子忠官至東萊太守散
騎常侍注引王隱晉書曰脩一子名儀據此則脩惟一子
實名儀官散騎常侍王哀傳亦云祖脩有名魏世父儀高
亮雅直此奏有散騎常侍臣儀爵同名同知是此人無疑
王隱晉書言東關之敗儀欲歸罪元帥為文帝所殺竊以

爲不然漢晉春秋載東關敗後朝議欲貶黜諸將景王曰
此我過也諸將何罪悉原之惟削文王爵而已習鑿齒曰
司馬大將軍引爲已過過消而業隆可謂智矣矧按此時
司馬氏方自引咎王儀一言何至遽加殺戮王隱所述爲
失其實或因是銜恨後借他故誅之知者以爲由論東關
事忤指故及此耳奏永寧時王儀猶存足證晉書之誣

關內侯臣芝

郭芝也明元郭皇后傳郭芝遷散騎常侍魏畧芝自以他
功封侯

尙書僕射光祿大夫高樂亭侯臣毓

盧毓也本傳吏部尚書封高樂亭侯轉僕射加光祿大夫
尚書關內侯臣觀

王觀也本傳司馬宣王誅曹爽賜爵關內侯復爲尚書

臣嘏

傅嘏也本傳遷尚書嘉平末賜爵關內侯

長合鄉侯臣亮

袁亮也高貴鄉公紀注尚書袁亮

臣贊

崔贊也高貴鄉公紀注尚書崔贊

臣騫

陳騫也高貴鄉公紀尙書陳騫

中書令臣康

孟康也杜恕傳注孟康嘉平末從渤海太守徵入爲中書令

御史中丞臣鈐

石鑿也鈐字誤晉書本傳仕魏至御史中丞錢未詳

博士臣範

未詳

臣峻

庾峻也高貴鄉公紀尙書博士庾峻

右四十六人錢少詹未詳者八人今攷出永寧太僕臣闕
爲張閣之譌散騎常侍臣儀爲王儀御史中丞臣鈐爲石
鑿之譌至如尹模曹初徐超三人官爵未有確證不敢遽
定又城門校尉臣慮博士臣範則全無依據姑闕之以俟
後之博古者

六年營齊王宮於河內重門制度皆如藩國之禮

按重門地名在河內共縣西北二十里晉景帝紀云舍河
內之重門有之字御覽九十引魏志作營齊王宮于河內
之重門宋本有之字今本譌脫陳仁錫以重門制度四字
爲一句蓋不知是地名而誤以爲宮室之制度也

高貴鄉公紀

四方征鎮

宋百官志云征東將軍征南將軍征西將軍征北將軍謂之四征鎮東將軍鎮南將軍鎮西將軍鎮北將軍謂之四鎮魚豢曰漢舊諸征與偏裨雜號同魏制秩二千石位次三公四鎮在四征之下漢末有鎮東鎮南鎮西而無鎮北鎮北魏置

正元元年假大將軍司馬景王黃鉞

魏朝惟曹真於黃初三年假節鉞曹爽於景初三年假節鉞節鉞者節傳斧鉞也曹休爲征東大將軍得假黃鉞凡

節將有三一使持節一持節一假節沈約云使持節得殺二千石持節殺無官位人若軍事得與使持節同假節惟軍事得殺犯軍令者至假黃鉞則可以專戮節將非人臣常器矣

年二 戊戌大將軍司馬景王征之

戊戌日誤晉紀作戊午亦誤

吳雲璈 鳴鈞 曰此紀正月乙丑儉欽反戊戌司馬景王征

之癸未郭淮薨閏月己亥破欽甲辰斬儉壬子赦淮南二月丁巳司馬文王爲大將軍日月與晉書景帝本紀多不合當以魏志爲正惟戊戌在癸未後今在癸未前知非戊

戊

安風淮津都尉斬儉

母邱儉傳從安風津擬壽春又安風津都尉部民張屬諸葛誕傳使誕督豫州諸軍渡安風津皆無淮字安風津在淮南

又按殺儉者安風津都尉部民張屬此不書張屬亦紀載之疎

八月辛未 戊辰

戊辰在辛未前此二日當互易

甘露元年肅義爲長

按易博士淳于俊講易用鄭注禮博士馬照亦宗鄭學惟
書博士庾峻從王肅義蓋庾峻係鄭表所舉表黨司馬氏
故峻亦宗王黜鄭

博士馬照

卽馬昭也高貴鄉公講尙書兩駁王肅之說知馬昭申鄭
難王諸論作於是時

注
惟正始三年九月辛未朔

推正始三年九月朔丙寅非辛未惟二年九月朔乃辛未
此三年係二年之譌攷帝以甘露五年卒紀云年二十正
始三年至甘露五年止得十九年然則帝生于正始二年

無疑矣

夏六月

此多夏字上巳書夏四月五月

年二作詩稽留

詩下脫賦字太平御覽九十引魏志云作詩賦稽留宋本

有賦字下言廣延詩賦則此句有賦字者是也

年三東里袞

武帝紀注袞作袞未知孰是

八月甲戌 丙寅

丙寅在甲戌前紀文倒誤

注 鄭元有子爲賊所害遺腹子名曰小同

康成惟一子名益恩適孫小同是遺腹子真誥協昌期云
鄭子真則康成之孫也患兩脚不授積年其晚用針灸兼
行曲折祝法百日都除攷康成止有一孫子真卽小同字

陳留王紀

封晉公增封二郡并前滿十

前甘露三年封邑八郡八郡者并州之太原上黨西河樂
平新興雁門司州之河東平陽也此增二郡則司州之宏
農雍州之馮翊皆晉故壤

景元二年 八月戊寅 甲寅

甲寅在九月戊寅甲寅相去四十七日

四年復除租賦之半五年

諸本皆以五年二字提行次於四年後誤以爲景元之五年也攷景元止四年無五年蜀後主以四年十一月降十二月癸丑特赦益州士民復除租賦之半五年謂每年復除其半凡五年也乙卯以鄧艾爲太尉鍾會爲司徒推是年十二月壬辰朔癸丑二十二日乙卯二十四日也今本以乙卯爲五年乙卯大謬後募蜀人內移至復除二十歲

咸熙元年正月壬辰

壬辰當爲壬戌

相國晉王奏復五等爵

御覽

一百九十九

引魏志云咸熙元年相國晉王奏建五等諸

公地方七十里

當依晉地理志作七十五里御覽脫五字

邑一千八百戶置相

一人

當作二人

典祠典書衛典禮各一人

衛上脫典字

妾六人車前

司馬十人旅賁四十人諸侯地方七十里邑千六百戶官

屬同諸公妾五人車前司馬八人旅賁三十六人伯地方

六十里邑千二百戶妾四人車前司馬六人旅賁二十八

人諸子地方五十里邑八百戶相一人典祠令典書丞典

衛丞各一人妾三人車前司馬四人旅賁二十八男地方

三十五里邑四百戶相一人典祠長典書丞各一人妾二

人車前司馬二人旅賁十二人又次國男方二十五里邑二百戶今魏志無之此必當時奏議之文也晉地理志晉文帝爲晉王命裴秀建立五等之制裴秀建五等之制裴潛傳注亦及之縣公邑千八百戶地方七十五里大國侯邑千六百戶地方七十里次國侯邑千四百戶地方六十五里大國伯邑千二百戶地方六十里次國伯邑千戶地方五十五里大國子邑八百戶地方五十里次國子邑六百戶地方四十五里男邑四百戶地方四十里與御覽所引魏志畧同惟不載置相典祠司馬旅賁人數又按晉志侯有大國侯次國侯伯有大國伯次國伯子有大國子次國子較御覽爲詳

而晉志于男但云男邑四百戶地方四十里無大次之分
御覽則云男地方三十五里邑四百戶次國男方二十五
里邑二百戶男亦有次國男之別矣

二年言有大人見三丈餘

三丈餘當作長三丈餘水經注引魏志作長三丈餘御

覽三百七十七兩引魏志並云長三丈餘宋書符瑞志亦

同又法苑珠林六道篇引魏志云有大人見長三丈餘知

古本有長字今脫

注封帝為陳留王

漢獻帝初封陳留王常道鄉公禪晉後亦封陳留王魏之

天下得於陳留王者失亦於陳留王

后妃傳

陳志后妃傳惟武帝卞皇后文帝甄皇后郭皇后明帝毛皇后郭皇后有傳齊王芳以下皇后皆不立傳按齊王以正始四年四月立皇后甄氏嘉平三年七月皇后甄氏崩葬懷甄后于太清陵四年二月立皇后張氏六年三月廢四月立皇后王氏高貴鄉公以正元二年立皇后卞氏常道鄉公以景元四年十月立皇后卞氏俱見三少帝紀齊王皇后甄氏附載文昭甄皇后傳高貴鄉公皇后卞氏常道鄉公皇后卞氏並附載武宣卞皇后傳

武宣卞皇后傳

其年五月初崩

五月當爲六月說見前

文德郭皇后傳

注惟青龍三年三月壬申

是年三月無壬申三月當爲二月郭后以二月壬申啓殯

三月庚寅葬

眉校月日十得七八其本書不誤而他書異同者不復贅說今畧舉數條以概其餘如宋天文志黃初四年二月癸卯月犯心大星魏志三月癸卯月犯心中央大星推二月

無癸卯魏志是也太和六年十一月庚寅陳思王植薨宋志在十二月推十二月無庚寅魏志是也魏志景初二年二月癸丑月犯心距星又犯心中央大星五月乙亥月犯心距星又犯中央大星宋天文志改二月癸丑爲己丑五月乙亥爲己亥當以夏正二月無癸丑五月無乙亥耳攷魏景初用丑正二月五月夏正之正月四月正月有癸丑四月有乙亥魏志是也宋志比晉志謬誤較少尙有此失晉志不足據可知矣然宋志亦有不及晉志處如宋五行志魏正始六年十月戊寅朔晉志作戊申朔宋天文志魏嘉平三年十一月癸未晉志作丁未宋五行志魏景元三

年三月己亥朔晉志作十一月己亥朔凡此皆晉志比宋志爲合大約古書流傳不能無誤亦不至全誤總在善讀者釐別之耳因與魏志無所糾改故不多述云